

COMUNICATO n. 2741 del 04/10/2021

Traduzione in ladino

Mendranzes linguistiches, l projet Ecça ge dèsc lèrga ai joegn

Cinch regions europeènes olache l'é mendranzes linguistiches, trei universitàes, vint scoles e passa cent joegn touc ite.

Chisc l'é i numeres del projet ECCA – European Charter Classroom Activities, scomenzadiva con a cef l Comun General de Fascia, metuda a jir per lurèr fora meterièi didatics ouc a la promozion di lengac regionèi e de mendranza. Endèna l'ultima conferenza, che la é stata en vender al 1m de otober te Provinzia autonoma de Trent aló dal Ciastel del Buonconsiglio, se à rejonà del lurier fat enscin ades e de co jir inant. Una de la proponetes l'é, per ejempie, chela de meter a la leta semper più meterièi en cont di deric linguistics de la mendrandes, e de smaorèr la rei di studenc, scoles e universitàes che tol pèrt. Te la scontrèda se à donca rejonà soraldut de la pèrt de relief che à la formazion, dassen emportanta per ge passèr l patrimoniè linguistich e culturèl a la neva generaziòn. Ence l sorastant del Partiment istruzion de la Provinzia Roberto Ceccato, l'à sottrissà l'emportanza de l'argument en costion e l'à portà l message de l'assessor provinzièl per l'istruzion e i joegn. L'autonomia medema, l'à prezisà, la se basa su la prejenza tel Trentin de la trei mendranzes linguistiches, ladina, mochena e zimbria. La Provinzia l'à donca dezidù de tor pèrt a chesta scomenzadiva, per ge dèr valor a chest patrimoniè linguistich a na vida originèla e neva, co la scola desche protagonista e colaboran co l'autra comunitàes linguistiches.

N pensier tout sù ence dai joegn. “L ladin l'é stèr adum, spartir coi etres, partezipazion, l'é pèrt de nos” l'é l message di studenc fascegn che à tout pèrt al contest video delaite de Ecça: “De gra al projet, zacan l'é stat dat lèrga a nos joegn. A chesta vida se ge dèsc vèlch da nef al patrimoniè linguistich e se pel tor sù neves ponc de veduda”.

L projet Ecça l'é pontà via d'uton del 2019 tel chèder de la scomenzadives cofinanzièdes da NPLD-Network to Promote Linguistic Diversity, rei europeèna che laora tel ciamp de la politica linguistica. Obietif de la Rei – a chela che tol pèrt ladins, mochegn e zimbres desche raprezentanc de la Provinzia automoma de Trent, che fèsc pèrt de la rei tras l Servije mendranzes linguistiches e audit european – l'é chel de tegnir sù, a livel european, la promozion de la desvalivanza linguistica.

L fin de la scomenzadiva l'é stat chel de meter a jir na lingia de scomenzadives scolastiches lurèdes fora su la basa de la Chèrta Europeèna per i lengac regionèi e de mendranza, tolan ite sacotanta regions olache l'é mendranzes linguistiches (estra che l Trentin, l Friul, la Frisia, la comunanza Valenziana e la Romania) ge dajan ai dozenc l met de se confrontèr e de endrezèr materièi didatics. Al projet, che aboncont l jirà inant, tol pèrt la scoles e i studenc, ma ence l'università e partner istituzionèi, che endreza materièi didatics e academics aldò.

A la conferenza, te la “Sala delle Marangonerie” à tout pèrt ence l Conseier Provinzièl Ladin, l Vizepresident ladin del Consei Provinzièl, l Procurador del Comun general de Fascia e la ex Procuradora e ades Senatora.

L sit del projet Ecce: <https://thisismylanguage.eu>

Traduzion di Servijes Linguistics e Culturèi del Comun general de Fascia
(Traduzione a cura dei Servizi Linguistici e culturali del Comun general de Fascia)

(cdt)